

قونشو قمر تاج خانيم

زهره وفائي



سنه لړ اونجه آناسي قمر تاج خانيم اولان قونشو قيزي ، نيم تاج خانيم لا ، بير توي دا راست لاشديق اوشاقلیق دونياسيني يئني دن تاپميش کيمي هر ايکيميز سئوينچ دن نه ائتمه يي بيلميرديک . گنجميش خاطره لري تر – تله سيک سايمغا باشلاديق . آنجاق زامان ، بيزيم خاطره لره سئغمادي . (بيزه گل ! بير ايله شيب دويون جا دئييب – دانيشاق .) نيم تاج خانيم دئدي . و سونرا عنوانيني منه وئردې . اورايا گنتمه يي قرار وئرديم .

بئش يتيم آناسي اولان رحمتليک قمر تاج خانيم ، حيات يولداشيني فرقه محاربه سينده ايتيرميش دير . نصرت بيگ آدليم فرقه چي 21 آذر فاجعه سيندن سونرا تبريزين سويوق قيشيندا ، دار کوچه لرين بيرينده تانينماز بير نامرد الي له گولله لنيب و اولموشدو . قمر تاج خانيم ايسه بئش اولادلا حيات چئنين ليک لري له تک باشينا قالميشدي . يادما گلله ن گونلرده من قمر تاج خانيمي محله خانيم لارينا ژاکت – اته ک – بلوز و... باشقا گنييم لر توخويارکن گورموشدوم . دئمه ک بو قرار ائو خرچ – مخارجيني چيخارديرميش . آنجاق اونون ائوينه گنتمه ک و سوز آپارماق منيم ان گوزه ل ساعات لاريم اولوردو .

ائو ، آستانا دان توت تا تنبي اوطاغينين بوخاري باشينا کيمي سانکي بير ال ايشي موزه يي کيمي گورونوردو . قمر تاج خانمين الي له تيکيلميش پرده لر – طاقچا پوش لار – متککه اوزلري – بالش اوزلري – چيراغ اورتوک لري – جعبه اوست لري – نه بيلم ساماور يئري – جانماز – تيمم کيسه سي – دم پخت – يخن اورتويو – رخت آويز اوستلويو و هر نه گوزه ل بير حال دا تيکيليپ و گوز سئراسينا دوزولموش دور . اللرينده دايم ايکي ميل چاپالارکن بيلميره م قمر تاج خانيم بونلاري تيکمه يه و دوغروسو يارتماغا نه زامان باشارميش دير ؟ توپراق ليق حيه طي بير ائيله سولاييب و مرمر ي له سوپورردي سانکي حيه ط توپراق دان يوخ مرمر دن توکولموش دير . هر نه قمر تاج خانيم ائوينده گول تک پاريلداييب و گول تک عطيرله نيردي !

گنجميش گونلرده نيم تاج خانيم ائوينه گنئديم . دوغروسو خاطره لر اوزوندن اونون ائويني عيني آناسي کيمي گوللو – عطيرلي و قادين الي له يارانميش تصور ائديريم . امما تصور لريم سهو وارميش ! مخمل موکت لر – فرحي موبيل لر – ريزلي قالي لار – بوفت لر – اوپن مطبخ – سايب سيز لامپا شارلاري – مککه سوغه تي ميز اورتوک لري – سفارش اولان پرده لر – کرکره لر بو ائوين هر نه يي بازاردان آلينيب ائوه تايخيلميش دير ! .. اوره بيم سيغيلدي .. سانکي بو ائوين

قاديڻي يوخموش !

دوغرودان زامان بيزلري نه ريه گنتيريب – يئتميش دير ؟ دوغرودان بيزيم قادين لارا نه گلميش دير ؟ اونلاردا اولان حيات سئوگي سي – ائو و عائله سئوگي سي ني کيم لر چالميش دير ؟ هر نه يي پول ايله آلماق و اوزه ل باشاري لاري هئچ ده قويماغي کيم بيزلره قئييدي ؟ بيزيم ذوق لي و صنعت کار قادين لاريميز ين الوان بوياقلي ساپ لارني کيم لر اللريندن آليب و اونلارين يئرینه الوان بوياقلي داوا – درمان لاري وئرميش دير ؟ دوغرودان هئچ بيليرسينيز قادين لاريميز آلتی بيرابر اركك لردن آرتيق حكيمة گنديب و درمان يئرلر ؟

Zohre_az@yahoo.com

<http://www.kitablar.com>

<http://www.kitablar.org/>